

Wam Pêtre Simãw Pêtre kot Jejus kôt hkwỳjê hwỳr kagà nê mẽnh

Simãw Pêtre na pre kagàja nhípêx. Kêp tep pynênh o pa xwỳnh tâ hpãnhã kêp Jejus nhỹ hã hkrajê jahkre ho pa xwỳnh. Nê krĩ pê Jerujarê kamã kêp Jejus krajê nhõ pastô. Na pre krĩ piitã hkôt Jejus ã mẽ kãm mẽ hkurê xwỳnhjaja tanhmã hã mẽ hipêx to nhũm Pêtre mẽ harênh ma nê mẽ hamaxpêr o hihtỳx kaxyw mẽ kãm kagàja nhípêx nê krĩ piitã hkôt mẽ hwỳr kurê. Mẽ kot kamã harênh nê mar nê amnhĩ kamã kahak kêt nê arĩ Tĩrtũm kôt amnhĩ nhípêx mex o pa kaxyw. Nê Jejus ã mẽ kot amnhĩ xà htỳx kamã hamak tâ nhỹrmã kaxkwa kamã mex nê pa ho pa hã mẽ kãm awjarê. ã mẽ kãm mẽmoj jarê nê hã kagà anê. Nê mẽ kãm:

¹ Pa mẽ ate Jejus kôt amnhĩ xunhwỳr nhũm Tĩrtũm kot mẽ ato hkra xwỳnhjaja. Xà mẽ amex? Ot pa mẽ awỳr kagà nhípêx nê kumê. Ixpê Simãw Pêtre na pa. Ixte Jejus nhỹ hã hkrajê jahkre ho mẽ ixpa xwỳnhjê hõ na pa mẽ awỳr kagà nê kumê.

Na xep pre Kris ã mẽ kãm mẽ pahkurê xwỳnhjaja tanhmã mẽ anhípêx to ka mẽ panhõ pika rũm mẽ umaj anhgrà nê ma ahpỹnhã krĩ hkôt ri apa.

Jao mẽ akwỳjaja ma pika pê Põt kamã krĩ hkwỳ hkôt apa.

Nê mẽ akwỳjaja pika pê Karatas wỳr apa.

Nê mẽ akwỳjaja pika pê Kapatos wỳr apa.

Nê mẽ akwỳjaja pika pê As wỳr apa.

Ně mẽ akwỳjaja Pitĩn wỳr apa.

Ã ahpỳnhã pika hkôt mẽ apigranh par anẽ. Tã ot pa mẽ awỳr kagà nhĩpêx nẽ mẽ apiitã mẽ awỳr kurẽ. Mẽ apỳnh nẽ mẽ ate kamã harẽnh nẽ ixkapêr mar kaxyw. ² Na pre Mẽpahpãm Tĩrtũmja amnhĩm mẽ pahte amnhĩ kaxyw kãm pajamaxpêr xwỳnhjê rê nẽ mẽ pahtã amnhĩ jarẽnh o:

–Kot paj jajê ho ixkra. Na pre ra Ixkra Jejus Kris ixpê mẽ nê ty nẽ htyk o hkamrô axkapĩ nhũm mẽ harẽnh ma nẽ hkôt amnhĩ xunhwỳ. Tã nhũm Ixkarõ mẽ hkarõ mã agjê nhũm mẽ ra inhmã hprãm xà kôt pix mã ri inhmã tanhmã amnhĩ nhĩpêx to ho pa.

Anhỳr o mẽ pahtã amnhĩ jarẽnh. Tã kê mẽ akutã nojarêr rãhã ho ri mẽ akôt pa ka mẽ ỹ hã axàmnhĩx ajamakêtkati nẽ akĩnh nẽ ri apa.

Mẽ pahte amnhĩ kukamã pajamaxpêr pê pahkĩnh o papa hã mẽ pamã karõ

Rukre 12.32-34; Rômãn 8.18-25; Sikũn Korĩt 4.16-18

³ Nẽ na pre mẽ panhõ Pahihti Jejus Krisja ty nhũm Hipêêxà Tĩrtũm akupỹm ho htĩr. Tã kot mẽ pakutã nojarêr rãhã ho pa jakamã na pre mẽ pahpê hkrajê mã mẽ pajamaxpêr nyw jagjê pu mẽ ỹ hã pahte amnhĩ nhĩpêx nyw o amnhĩ nhĩpêx o papa. Hãmri nẽ Jejus akupỹm htĩrja mã pajamaxpêr nẽ amnhĩ kukamã pajamaxpêr o:

–Kot paj nhỹrmã ty nhũm Tĩrtũm kot Jejus nhĩpêx pyrã nẽ akupỹm ixto ixtĩr pa wa kuri ixtĩr tũm nẽ inhmex kumrêx rãhã ixpa ho ixpa. Nà koja ã inhĩpêx anẽ.

Anhÿr o pajamexpêr jakamã kwa kêr pu mẽ Tĩrtũm mã mex o mex ã mãn harênh rãhã ho papa. ⁴Na ra mẽ pakutêp õ krĩ kamã mẽmoj piitã ho mex nê. Õ krĩ kamã mẽmoj kot omnu nê hapêx kêt jakamã na pu htem amnhĩ tã hamãr rãhã ho papa.

⁵Nê mẽ kot Kris ã mẽ atomnuj mÿrapê na ka mẽ amnhĩ xà htÿx kamã ajamak o ri apa nom arĩ amnhĩ kaxyw Tĩrtũm mã ajamexpêr rãhã ho ri apa. Hihtÿx o hihtÿx jakamã koja mẽ pahkõt pa ho pa nê mẽ pamã pajamexpêr o hihtÿx rãhã nhũm nhÿrmã Jejus akupÿm mẽ pahwÿr wrÿ. Hãmri pu mẽ hkõt ri amnhĩ nhĩpêx mex rãhã ho ri papa. Ra Tĩrtũm kot mẽ pakukamã mẽ pajarênh xà hkõt.

⁶Jar mẽ pahte arĩ amnhĩ xà htÿx kãm pajamak o papa htã na pu htem Tĩrtũm nhÿrmã kot mẽ pahto mexta kukamã pajamexpêr hãmri nê tee ri amnhĩ kukamã pajamexpêr kêt nê. Mẽ pahpê mẽ pahpunuj tũm nê ri papa ho papa mã xwÿnh kêt.

⁷Na hte Tĩrtũm mẽ panhĩpêx o te mẽ kot ôr nhĩpêx pyrãk. Na htem hprĩ hã tanhmã ôr kute hã omu. Kêp ôr kumrêx ã omu rÿ mẽmoj mẽ ho pihkàr ã omunh kaxyw kuwy kamã kurê. Nhũm piitã ôr nê pigãnh pa japêr nhũm mẽ omu nê harênh o:

—Nà ãm hãmri. Kêp ôr kumrêx nê mẽmoj mẽ ho pihkàr kêt. Anê.

Na hte Tĩrtũm ã mẽ panhĩpêx anê. Jakamã mẽ pahpê Jejus kõt amnhĩ nhĩpêx o mẽ papa xwÿnhjaja mẽ pahte tõiã tanhmã pahpunuj to htã no nhũm mẽ panê ja rênh kêt nê. Na hte amnhĩ tã mẽ pahpumu nê hamexpêr o:

—Kot pajkormã ja hã mẽ hamã nê tokÿx akupÿm mẽ ho mex kêt nê. Koja mẽ omnuj nê pa htã tee

ri amnhĩ kukamã hamaxpêr nê ixkaga hkêt nê arĩ amnhĩ kaxyw ixkôt hamaxpêr rãhã ho pa. Hãmri nhũm mẽ hkwỳjaja ja hã mẽ omu nê mẽ kêp ixkra hã mẽ omunh kurê kumrêx. Te mẽ kot hprĩ hã ôr pumunh nê kêp ôr kumrêx ã omunhta pyræk. Anê.

Jakamã kêr pu mẽ arĩ amnhĩ kaxyw hkôt pajamaxpêr rãhã ho papa. Mẽmo mỳrapê mẽ pahpunuj nê ri papa htã arĩ hkôt pajamaxpêr rãhã nhũm Jêjus nhỹrmã akupỳn mẽ pahwỳr wrỳ. Hãmri nhũm Tĩrtũm mẽ pahpumu nê mẽ pamã:

—Nà ãm hãmri na ka prem amnhĩ kaxyw ixpix mã ajamaxpêr rãhã ho ri apa. Mẽ kot ixtã tanhmã mẽ atomnuj to nhũm mẽ ate amnhĩ xà htỳx kamã ajamak o apa htã aa ixkaga hkêt nê arĩ amnhĩ kaxyw inhmã ajamaxpêr rãhã ho ri apa. Nà ãm hãmri mẽ ate amnhĩ to mex kumrêx xwỳnh na ka mẽ. Kot paj mẽ piitã mẽ kãm ja hã mẽ ajarê.

Anhỹr o mẽ pamã kapêr.

Nê ôr o mẽ hikukrêxja mex tã koja arĩ mex rãhã hkêt nê. Kojã mẽhõ kãm tanhmã homnu hto hprãm nê homnu hpa. No mẽ papajaja kot puj mẽ arĩ amnhĩ kaxyw Tĩrtũm mã pajamaxpêr rãhã ho papa hãmri nê ôrta pyrã nê pajapêx kêt nê. Kurom mẽ pamex tũm nê aa pajapêx kêt nê papa ho papa.

⁸⁻⁹ Nê Jêjusja aa mẽ ate ano ho omunh kêt tã na ka htem kãm mẽ ajapê htỳx nê kot mẽ panê tanhmã amnhĩ nhĩpêx to hã harênh ma nê mẽ amã hkĩnh nê. Nê amnhĩ kaxyw hkôt ajamaxpêr mex rãhã ho ri apa. Jakamã na pre Tĩrtũm ja hã mẽ apumu nê mẽ ato hkra nê mẽ apê õ krĩ kamã wa kuri amex nê apa mã xwỳnh ã mẽ ajarê. Ja kaxyw na pu prem amnhĩ kaxyw hkôt pajamaxpêr rãhã jao pahkĩnh nê ri papa. Nê tee ri tanhmã amnhĩ

kĩnh tỳx ã amnhĩ jarēnh to hkukamã pajamaxpēr. Kormã aa ã mẽ pahkĩnh anhỹr kêt tã mẽ pahkĩnh tỳx nē ri papa.

¹⁰ Nē Tĩrtũm kot mẽ pahto mex pē mẽ panē mẽ pahte amnhĩ tomnuj rēnh par nhũm kuri mẽ pahtĩr tũm nē mẽ papa hã mẽ pajarēnhja. Amnepē mã Tĩrtũm nhỹ hã kapēr jarēnh o ri mẽ pa xwỳnhjaja na pre mẽ pakukamã ã mẽ pajarēnh anhỹrja ma nē tee ri hamaxpēr nē tee ri hã axpēn kukjēr o ri axpēn kôt pa. Nom hprĩ hã mar mex kêt nē. Tã arĩ ri mẽ pakukamã hkwyjē mã ja hã mẽ pajarēnh o ri pa.

¹¹ Na pre Tĩrtũm Karōja Kris tyk kukamã mẽ kãm ã mẽ pajarēnh anhỹr o amnhĩrĩt. Kormã Kris kaxkwa kamã pa ri. Kormã wrỳk nē katorxà nhõxàhkre rũm kator kêt ri nhũm pre hkukamã mẽ kãm tanhmã ho amnhĩrĩt to. Mẽ kot hpĩr nhũm kot amnhĩ xà htỳx kãm hamak kãm mẽ panē htykja ã hkukamã mẽ kãm harēnh o amnhĩrĩt. Nhũm Tĩrtũm kot akupỹm ho htĩr nē kãm mex o mex ã harēnhja nhũm hkukamã mẽ kãm harēnh o amnhĩrĩt. No ãm hprĩ hã mẽ kãm mēhõ nhĩxi hkôt harēnh kêt jakamã nhũm prem harēnh ma nē tee ri hkukamã ri hamaxpēr nē tee ri hã axpēn kukjēr o ri axpēn kôt pa. Nē hã axpēn kukjēr o:

—Kwa mēhõ koja we ã amnhĩ nhĩpēx anē? Xà koja tokyx ã amnhĩ nhĩpēx anē nà kormã?

Anhỹr o hã axpēn kukjēr o ri pa. ¹² Hãmri nhũm Tĩrtũm axte mẽ kãm Jejus jarēnh kwỳ ho amnhĩrĩt nē mẽ kãm:

—Nà mẽ anoo mã koja ã amnhĩ nhĩpēx anhỹr hkêt nē. Mẽ amỹr pē mẽ akanrēhã mẽ akra nē mẽ

atàmnhwỳjê noo mã koja kato nê mẽ hkôt ã amnhĩ nhĩpêx anhỳr o pa. Anê.

Mê papamjaja mẽ panoo mã kator nê ã kot amnhĩ nhĩpêx anhỳr o paja o ã mẽ kãm ho amnhĩrĩt anê.

Amnepêm Tĩrtũm nhỹ hã kapêr o ri mẽ pa xwỳnhjaja nê jarãhã mẽ ixte Jejus nhỹ hã mẽ ahkre ho ri ixpa xwỳnhjaja mẽ ixkapêr ãm pixii. Na pa htem wamtajê pyrà nê Tĩrtũm Karõ nhỹ hã àhpumunh tỳx xà ho mẽ amã tanhmã Jejus jarênh to ho ri mẽ akôt ixpa. Nhũm hte Tĩrtũm kapêr o mẽ wrỳk xwỳnhjaja mẽ ixkapêr ma nê tee ri hamaxpêr o mẽ pahpyrà nê kãm hprĩ hã harênh mar par prãm nê.

Mê pahte Tĩrtũm pyrà nê tãm amnhĩ nhĩpêx ã mẽ pamã karõ

Epes 4.1-3; Korosê 1.10-12; Sikũn Pêtre 3.10-13; Wam Juãw 3.1-6

¹³E kwa Kris kôt ixtõ nê ixtõxjaja. Kêr ka mẽ Jejus kutêp mẽmoj punuj kutã amnhĩ to htỳx rãhã ho ri apa. Nê Tĩrtũm mã amnhĩ nhĩpêx mex rãhã nê. Pê tãm ajamaxpêr nê tãm amnhĩ nhĩpêx o apa. Nê mẽ ã ajamaxpêr anhỳr o:

—Nà koja nhỹrmã Jejus akupỳn mẽ ixwỳr wrỳ hãmri nhũm Tĩrtũm ixto mex rax nê. Nà koja ã inhĩpêx anê. Anê.

¹⁴Nê kêr ka mẽ Tĩrtũm kapêr kôt pix mã mãn ri amnhĩ nhĩpêx mex rãhã ho ri apa. Te mẽhprĩre kot mẽ hipêêxà kapêr mar nê hkôt amnhĩ nhĩpêx pyràk. Kormã mẽ ate Kris kôt amnhĩ xunhwỳr kêt ri na ka prem ate amnhĩ nhĩpêx tũm kôt ri tanhmã amnhĩ tomnuj to ho ri apa. ¹⁵Tã kêr ka mẽ hpãnhã

amnhĩ to mex o mǎn ajamaxpêr o apa nê Tĩrtũm pyrà nê amnhĩ tomnuj o apa hkêt nê. Tĩrtũmja kot amnhĩ to mex pix o pa xwỳnh na. ¹⁶ Kapêr ǎ kagà htũm kot ja jarênh kot:

Kêr ka mẽ ixpyrà nê amnhĩ to mex pix o ri apa. Anê.

¹⁷ Tǎ koja nhỹrmǎ kêp Mẽpahpǎm maati hǎ hprĩ hǎ mẽ pahte amnhĩ nhĩpêx ǎ mẽ pahpumunh hkôt tanhmǎ mẽ pajarênh to. Tǎm mẽ pahte amnhĩ nhĩpêx kôt mẽ pajarê rỳ mẽ pahte amnhĩ tomnuj kôt mẽ pajarê. Hǎmri nê ahpỹnhǎ mẽ panhĩpêx. Mẽ pahto mex nê rỳ mẽ pahtomnuj nê. Jakamǎ kwa pu mẽ nhỹrmǎ kot tanhmǎ mẽ pahtomnuj to pymaj hkôt pix mǎ amnhĩ nhĩpêx o ri papa rǎhǎ nê.

¹⁸ Nê kormǎ mẽ pahte Jejus kôt amnhĩ xunhwỳr kêt ri na pu prem mẽ panhĩgêt pyrà nê pahtỳx ri amnhĩ tomnuj o ri papa. Tǎ nhũm Krisja te amnhĩm mẽ pajaprôr pyràk o mẽ panhĩpêx. Mẽ pahte hpǎnhǎ kapêr kôt pix mǎ amnhĩ nhĩpêx o papa kaxyw. No mẽmoj to na pre mẽ pahpǎnhǎ amnhĩre? Nà ra mẽ pahte ja jarênh mar tỳx. Na pre kàxpore ho mẽ pahpǎnhǎ amnhĩrer kêt nê. Rỳ ôr o mẽ hikukrêx ǎ ohtô ho mẽ pahpǎnhǎ amnhĩrer kêt nê. Rỳ prat o mẽ hikukrêx ǎ ohtô ho mẽ pahpǎnhǎ amnhĩrer kêt nê. Jajaja hapêx tokyx anhỳr mǎ xwỳnh na. ¹⁹ Na pre ǎ mẽ hpǎnhǎ amnhĩrer anê nê tǎm mẽ panê ty nê htyk o amnhĩ nhĩ ho mẽ pahpǎnhǎ amnhĩrer pa. Nhũm hkamrô axkapĩ. Te amnepê mǎ mẽ panhĩgêt kot amnhĩ pǎnhǎ Tĩrtũm mǎ ôwêhti hkrare hpar nhũm hkamrô pikapĩrta pyràk. ôwêhti krare mexre pix na prem kǎm kupa. Mex nê tanhmǎ kute hkêt xwỳnh pix. Tǎ Krisja aa tanhmǎ amnhĩ tomnuj to hkêt kumrêx nê mẽ

panê ty nê htyk o Tirtûm mã mẽ pahte amnhĩ tomnuj piitã hpãnhã amnhĩrer pa. ²⁰ Amnepê mã kormã mẽmoj kêt ri na pre Tirtûm kot ã mẽ pahpãnhã amnhĩrer anhỹr kaxyw mẽ pakukamã kuta nê ãm. Tã nhũm amgrà ohtô nê hapêx nhũm mẽ pahwỳr kumẽ nhũm man mẽ pahwỳr wrỳ. Kot ã mẽ pahpãnhã amnhĩ nhĩpêx anhỹr kaxyw. ²¹ Tã nhũm prem kupĩ nhũm Tirtûm akupỹm ho htĩr nê mex o mex ã harê. Mẽ pahte ja hã harênh mar kôt amnhĩ kaxyw Tirtûm pix mã pajamaxpêr o ri papa kaxyw. Nẽ mẽ pahte amnhĩ wỳr Jejus jamãr rãhã ho ri papa kaxyw.

²² Tã pu prem ra kot ã mẽ panê amnhĩ nhĩpêx anhỹr ã harênh ma nê mẽ pahte amnhĩ tomnuj kaga nê hkôt amnhĩ xunhwỳ. Jao amnhĩ to mex pix o ri papa. Nẽ mẽ pamã Kris kôt mẽ pahkwỳjê hĩnh o papa. Tã kwa kêr pu mẽ arĩ pamã axpên kĩnh tỳx rãhã ho papa.

*Te mẽ pakatorxà rũm mẽ pajapôx pyràk o axte mẽ pajapôx ã mẽ pajarênh
Juãw 3.1-21*

²³ Nẽ na pu prem mẽ pakatorxà nhõxàhkre rũm mẽ pajapôx pyrà nê axte mẽ pajapôx pyràk o amnhĩ nhĩpêx. Jao ra mẽ pahpê Tirtûm kra nê ri papa. Na hte mẽ pakatorxà nê mẽ panhĩpêxàja wa ri pa nê gaa nê mẽ pahpê ty. No kêt Mẽpanhĩpêxà maati Tirtûmja wa kurom rãhã ho rãhã. Tã ra mẽ pahte amnhĩ kaxyw kapêr kôt pajamaxpêr o pahpê hkra jakamã kot puj mẽ uràk nê nhỹrmã pahĩr tũm nê papa rãhã ho papa.

Ně Tĩrtũm kapěrja Tĩrtũm pyrà ně rãhãã. Koja aa hapêx kêt nẽ. ²⁴ Kapěr ã kagà htũm kot ja jarẽnh kot:

Pika piitã hkôt mẽ pa xwỳnhjaja te mẽ kot põti grà pyràk.

Ně mẽ kot amnhĩ to mex xàja te kot kapôt ã pixôrà pyràk.

Na hte põti tokyx grà nẽ hapêx.

Ně pixôràja haxwỳja arĩgro htỳx mẽ nhũm grà tokyx anẽ nẽ rarak pa nẽ hapêx.

²⁵ No Tĩrtũm kapěr koja põti mẽ pixôràta wa kurom aa hapêx kêt nẽ. Koja arĩ rãhã ho rãhã. Anẽ. Tã kapěrja tãm na htem mẽ pamã kamã harẽ pu mẽ pahpiitã mar o papa.

2

Mẽ pahte Tĩrtũm kot amnhĩ nhĩpêx kôt amnhĩ nhĩpêx ã mẽ pamã karõ

Rõmãn 12.2; Wam Korĩt 3.16-17; Epes 2.19-22

¹ Nẽ kwa kêt pu mẽ axte tanhmã amnhĩ tomnuj to ho ri papa hkêt nẽ.

Rỳ tanhmã axpẽn mã paxêx to hkêt nẽ.

Nẽ paxêx rom tanhmã ri axpẽn nokupyr to hkêt nẽ.

Ně mẽmoj tã axpẽn kãm pagryk kêt nẽ.

Ně tanhmã axpẽn japyrỳ hto hkêt nẽ.

Kêr pu mẽ ã amnhĩ nhĩpêx anhỹr o papa hkêt kumrêx.

² Mẽ hkaràre na htem ãm kãm pijaôr pix prãm. Nẽ gaa nẽ htỳxre nẽ ra hprêk o mõi. Tã kêr ka mẽ pijaôr pix prãm xwỳnhjê pyrà nẽ amã Tĩrtũm kapěr mar nẽ hkôt pix mã amnhĩ nhĩpêx o apa hprãm. Jao mar tỳx pê ra hkôt amnhĩ nhĩpêx mex o mõi nẽ

gaa nê hkôt amnhĩ nhĩpêx mex o apa. Te mẽ karàre pijaôr nê gaa nê ra hprêk o môrta pyràk. ³Ra mẽ ate Jejus kot mẽ pahto mex ã omunh mex kênã.

⁴Nê na htem kên o ixkre nhĩpêx kaxyw hãmri nê hkwy kawrà nê ri hkapi. Nhũm hõ mex kêt nhũm mẽ tee ri omu nê nhãm kumê. Tã ja pyrà nê na pre mẽ pahkwỳjaja tee ri Kris pumu nê htỳx mex kêt ã hkamnhĩx nê te mẽ kot kên mênhta pyràk o hipêx nê hkaga. No nhũm Tĩrtũmja amnhĩm Kris mex o mex ã harê. Te ho mẽhõ kot kên mex kêt ã hkamnhĩx nê mênh nhũm mẽhõ kot mex ã omunh nê amnhĩm mỳnhta pyràk. Nom Krisja kên rom kêp htĩr tũm nê pa xwỳnh jakamã nhũm pre Tĩrtũm mẽ pakaxyw ãm pu prem hkôt amnhĩ xunhwỳ.

⁵Nê Tĩrtũm na hte nhỹrmã mẽ pahtĩr tũm nê wa kuri mẽ papa mã xwỳnh ã mẽ pajarê. Te mẽ pahpê kên nhũm Tĩrtũm te kot amnhĩ Karõ mã mẽ pahto ixkre nhĩpêx pyràk. Jakamã na hte Jejus Kris tanhmã mẽ pahkrã hto pu mẽ Tĩrtũm kôt amnhĩ nhĩpêx mex rãhã ho ri papa. Nê tanhmã kãm amnhĩ nhĩpêx mex to nhũm ja hã mẽ pahpumu nê hkĩnh nê.

⁶Tĩrtũm kapêr ã kagà htũm kot tanhmã Kris jarênh to. Nê hã kuxi nê tanhmã harênh to. Te kêp kên pyràk ã harê nê harênh kot:

Kot paj nhỹrmã Ijaew wỳr mẽhõ mẽ nhũm mẽ hkôt pa ho pa.

Koja te kêp kên o inhõrkwỳ nhĩpêx kaxyw kên maati mex kumrêxta pyràk.

Koja amnhĩ kaxyw hkôt mẽ hamaxpêr xwỳnhjaja nhỹrmã ma inhõ krĩ hwỳr api nê hkĩnh nê mex rãhã nê pa ho pa. Anê.

7 Tã ra amnhĩ kaxyw hkôt mẽ pajamaxpêr xwýnhjaja. Kên pyræk xwýnh pê Jesusja na mẽ pamã mex o mex. No mẽ kot hkaga xwýnhjaja na htem hamaxpêr punuj xwýnh ã hkamnhĩx nê hkaga nê kãm hkĩnh kêt nê. Tĩrtũm kapêr ã kagà htũm kot mẽ harênh kot:

Na prem kên o amnhĩm òrkwỹ nhĩpêx kaxyw hkawrà ho pa nê kên maatija pumu nê htỳx omnuj ã hkamnhĩx nê hkaga.

Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Anê.

8 Nê mãănênh harênh kot:

Koja mẽ kapêr mar kêt kumrêx.

Te pry kamã kên nôr nhũm mẽ kot nhãm pry nê mẽnh kaxyw hkamnâr o amnhĩ par krã hi kukênh pyræk o koja mẽ amnhĩ nhĩpêx. Anê.

Mẽ kot Kris kapêr mar tã hkôt amnhĩ xunhwỳr kêt jakamã te ho mẽ kot amnhĩ nê kên kamnâr o amnhĩ par krã hi kukênh pyræk o koja mẽ amnhĩ nhĩpêx. Jakamã koja nhỹrmã Tĩrtũmja ja hã tanhmã mẽ ho htỳx kumrêx. Ra kot amnhĩ kukamã mẽ kãm amnhĩ jarênh xà hkôt. ⁹ No mẽ papajaja na pre Tĩrtũm jajê rom amnhĩ kôt mẽ paxunhwỳ. Nhỹrmã ò krĩ kamã mẽ papa ho papa kaxyw. Nê mẽ pahte mex o mex ã harênh kaxyw. Na pu htem Ijaew nhõ patre pyrà nê Pahi Maati Tĩrtũm mã tanhmã amnhĩ nhĩpêx to ho papa. Nom kormã mẽ pahte Kris kôt amnhĩ xunhwỳr kêt ri te mẽ pahpê kamàt kô kamã mẽ pahtỳx ri mẽ papa xwýnh pyræk. Tã Jesus kôt amnhĩ xunhwỳ nê hpãnhã te mẽ pahpê hirã mex kãm ri mẽ papa xwýnh pyrà nê tãm amnhĩ nhĩpêx rãhã ho papa. Ra

mê pahpê Tirtûm kra jakamã na pu htem amnhĩ to mex rãhã ho ri papa. Nê Měpahpãm maati Tirtûm mã tanhmã amnhĩ nhĩpêx to ho ri papa. Te mê kot mê ho àhwÿr xwÿnhjaja kot kãm amnhĩ nhĩpêx o pata pyræk. ã na pre Tirtûm mê pahte amnhĩ nhĩpêx anhÿr o papa kaxyw mê panhĩpêx.

¹⁰ Amnepêm kormã mê pahpê hkra hkêt ri na pre mēhō mê pakamã ukaprĩ hkêt kumrêx pu htem pahpunuj nê ri papa. Tã Jejus kôt amnhĩ xunhwÿ nhũm Tirtûm mê pahto hkra pu mê pahpê hkra hã ri papa nhũm mê pakamã ukaprĩ rãhã ho mê pahkôt pa.

Mê pahpê Tirtûm mã tanhmã amnhĩ nhĩpêx to xwÿnh ã mê pajarênh

Rômãn 13.1-7; Xitre 3.1

¹¹ E ixkràmnhwÿjaja. Ra mê pahpê Tirtûm kra jakamã mê pahpê ô krĩ nhõ xwÿnh. Te mê pahpê jar pika nhõ xwÿnh kêt pyræk jakamã kwa kêr pu mê arĩ mê pahte amnhĩ nhĩpêx tũm o amnhĩ nhĩpêx kêt nê. Nê mê pajamaxpêr tũm o pajamaxpêr kêt nê. Ra axtem mê pajamaxpêr nyw nê axtem mê pahte amnhĩ nhĩpêx nyw kênã. Mê pahte amnhĩ nhĩpêx tũmja te kãm akupÿm mê pahte hkôt amnhĩ to paxujanãr prãm pyræk. Mê pahte axte hkôt amnhĩ nhĩpêx o ri papa kaxyw. Tã nom kêr pu mê anhÿr kêt nê. ¹² E kwa kêr ka mê anhõ krĩ kamã akwÿ kot Kris kôt amnhĩ xunhwÿr kêt xwÿnhjê noo mã tãm ri amnhĩ nhĩpêx o ri apa. Mê kot Kris ã tanhmã mê anhĩpêx to rÿ tanhmã hã mê ato kapêr punuj to htãã. Kot kaj mê ã mê hkôt amnhĩ nhĩpêx anhÿr o ri apa hãmri nhũm mê tee ri mê apumu nê hamaxpêr o:

—Kwa mẽ ixte mẽ kot amnhĩ tomnuj xwỳnh ã mẽ harēnh tã mẽ kot amnhĩ to mex pix xwỳnh na mẽ. Anē.

Hãmri nē nhỹrmã mẽ pahpyrà nē Tĩrtũm kôt amnhĩ xunhwỳ nē kãm mex o mex ã harē nē kãm:

—Kwa Tĩrtũm. Na pre hte akrajaja anhỹ hã amnhĩ to mex rãhã nē pa ho pa pa ja hã mẽ omu. Nà xep amex o amex Tĩrtũm. Anē.

¹³ Nē mẽ apê Pahihti Jejus Kris kôt amnhĩ nhĩpêx xwỳnh jakamã kêr ka mẽ anhõ krĩ kamã mẽ anhõ pahihti kapêr ma nē kapêr kôt mãn amnhĩ nhĩpêx mex o ri apa. Nē mẽ anhõ pika kamã mẽ anhõ prêjitēnja ka mẽ kapêr ma nē hkôt amnhĩ nhĩpêx. Mẽ kot mẽ ato amnhĩptàr xwỳnhjaja ka mẽ piitã mẽ kapêr ma nē mẽ kapêr kôt pix mã amnhĩ nhĩpêx rãhã ho ri apa. ¹⁴ Nē mẽ anhõ pahi nhỹ hã mẽ kapêr o mẽ pa xwỳnhjaja na htem mẽ akaxyw mẽ unhwỳ. Mẽ kot amnhĩ tomnuj xwỳnhjaja nhũm tanhmã mẽ kot mẽ ho kaxyw. Nē tãm mẽ kot amnhĩ nhĩpêx o ri mẽ pa xwỳnhjaja nhũm mẽ kot mẽ õ pahi mã mex ã mẽ harēnh kaxyw. ¹⁵ Tã kêr ka mẽ kapêr ma nē mẽ hkôt tãm amnhĩ nhĩpêx rãhã ho ri apa. Hãmri nhũm mẽ ato kapêr punuj xwỳnhjaja ja hã mẽ apumu nē axte tanhmã mẽ ato kapêr to hkêt nē. ã mẽ ate amnhĩ nhĩpêx anhỹr o apaja na Tĩrtũm kãm hprãm.

¹⁶ Nē mẽ pahpê Tĩrtũm kra jakamã na pu htem paxàmnhĩx kãm tanhmã amnhĩ nhĩpêx to ho ri papa. Nom kêr pu mẽ pahpê hkra hã pahtỳx ri amnhĩ nhĩpêx kêt nē.

¹⁷ Nē kêr ka mẽ piitã mẽ ho mex o ri apa.

Nē mẽ ato amnhĩptàr xwỳnhjê ho mex nē mẽ hã apijaàm rãhã ho ri apa.

Ně mẽ apê Kris kôt mẽ ate axpên to mẽ atõ nẽ mẽ atõxjê hã amã axpên kĩnh pê axpên to mex nẽ. Nẽ Tĩrtũm ã apijaàm rãhã nẽ.

Mẽ kãm mẽ apênh xwỳnhjaja kot tanhmã amnhĩ nhĩpêx to hã mẽ kãm karõ

Epes 6.5-8; Korosẽ 3.22-25; Wam Ximotre 6.1-2; Xitre 2.9-10

¹⁸ Nẽ mẽ apê mẽ kãm mẽ axapênh xwỳnhjaja kêr ka mẽ anhõ patrãw kapêr ma nẽ hkôt ri amnhĩ nhĩpêx. Kot mẽ ato mex o pa rỳ mẽ atomnuj o pa htã ka mẽ arĩ mẽ hã apijaàm pê hkôt ri amnhĩ nhĩpêx. ¹⁹ Tanhmã kot mẽ anhĩpêx punuj to htã ka mẽ arĩ kãm axapênh mex rãhã nẽ. Kêr kê Tĩrtũm ja hã mẽ apumu nẽ mẽ ato mex nẽ ka mẽ ajamakêtkati nẽ axàmnhĩx ri kãm axapênh o apa. ²⁰ Nom kot kaj tanhmã amnhĩ tomnuj to nhũm anhõ patrãw ja hã apumu nẽ hã atak ka amnhĩ xà htỳx kamã ama nẽ rĩ amnhĩ pumu. No kot kaj akatàt kôt kãm axapênh mex tã nhũm amarĩ atak japêr tã kêr ka amnhĩ tã kamã agryk kêt nẽ. Arĩ kãm amnhĩ to htỳx kamã kãm xa nẽ amnhĩ tã tanhmã ho hkêt nẽ. Hãmri nhũm Tĩrtũm ja hã apumu nẽ ato mex nẽ. ²¹ Amnepêem na pre mẽ pahte hkôt amnhĩ xunhwỳr xwỳnhjaja Kris pyrã nẽ mẽ paxà htỳx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhĩ xà htỳx kãm hamak tỳx tã amnhĩ to htỳx nẽ mẽ kãm xa. Tã kêr pu amnhĩ xà htỳx kamã pajamak tã y hã uràk nẽ amnhĩ to htỳx nẽ papa. ²² Krisja aa tanhmã amnhĩ tomnuj to hkêt nẽ pa ho pa. Nẽ aa mẽmoj tã amnhĩ to hêx o pa hkêt. ²³ Mẽ kot kãm kapêr punuj tã nhũm amnhĩ tã tanhmã

mě kãm nê hkêt nê. Nê mẽ kãm kapêr punuj kêt nê. Nhũm prem homnuj tỳx kumrêx nhũm amnhĩ xà htỳx kamã hamak tã amnhĩ tã mẽ kãm àkjêr nê tanhmã mẽ haprỳ hto hkêt nê. Na pre âm hamaxpêr o: “Nà Tĩrtũm kot ixtã mẽ omunh mex kênã. Koja nhỹrmã mẽ piitã tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to. Tãm koja àhpumunh tỳx xà hkôt tanhmã ixtã mẽ harênh to. Mẽ kurom àhpumunh tỳx o àhpumunh tỳx xwỳnh kênã.” Anê.

²⁴ Kris na pre te kawà kamã mẽ pahte amnhĩ tomnuj piitã gjênh nê ho nỳt nê htur rãhã pĩ kahpa hã mẽ panê htyk pyràk o amnhĩ nhĩpêx. Mẽ pahte axte tanhmã amnhĩ tomnuj to hkêt prãm xàj. Pãnhã mẽ pahte amnhĩ to mex pix o ri papa kaxyw. Tã ã kot amnhĩ xà htỳx kãm hamak anhỹr o jêt jakamã kot puj mẽ pahte hkôt amnhĩ xunhwỳr xwỳnhjaja aa mẽ pahte amnhĩ tomnuj pãnhã amnhĩrer kêt nê. Ra Jesus htyk o kot mẽ panê amnhĩrer par kênã.

²⁵ Na pu pre te mẽ pahpê ôwêhti pikunor pyrà nê pahtỳx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwỳnh kot ôwêhti pikunor mã katorta pyràk o mẽ panhĩpêx. Pu mẽ hkôt amnhĩ xunhwỳ nê hkôt amnhĩ nhĩpêx mex o ri papa. Jao hkôt papa ho papa.

3

Mẽ mjên mẽ mẽ hprô kot tanhmã axpên nhĩpêx to hã mẽ kãm karô

Wam Korĩt 7; Epes 5.22-25; Korosẽ 3.18-19; Wam Ximotre 2.9-15

¹ Nê kêr ka mẽ anijaja mẽ amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mẽ ate amnhĩ nhĩpêx ã mẽ apumu nê mẽ apyrà nê Kris kôt amnhĩ xunhwÿr japêr. Mẽ kãm Tĩrtũm kapêr mar prãm kêt tã koja mẽ ã mẽ ate amnhĩ nhĩpêx anhÿr ã mẽ apumunh kôt mẽ apyrà nê amnhĩ kaxyw hkôt hamaxpêr japêr. ² Na htem mẽ ate Tĩrtũm kapêr kôt tãm ri amnhĩ nhĩpêx o apa hã mẽ apumunh o ri mẽ akôt pa.

³ Jakamã kêr ka mẽ anijaja amnhĩ mex pix kukamã ajamaxpêr o ri apa hkêt nê. Rÿ ajamaxpêr o:

—Ma kot paj mẽ hkuxwaxà ho amnhĩ krã hkĩ kuxwa mex nê inhõkrexê mex jagjê nê ri hã mra. Nê kupêxê mex kwÿ japrô nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mẽ piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhÿr o ri amnhĩ kukamã ajamaxpêr kêt nê. ⁴ Tĩrtũm na hte ã mẽ pahte amnhĩ nhĩpêx anhÿr ã mẽ pahpumu nê ãm hã mẽ pahpumu. Mẽ õkrexê nê mẽ ê mex na hte hapêx tokyx anê. No mẽ panhõpinhxà kaxwÿnh kãm tãm ri mẽ pajamaxpêr nê pakamã amnhĩkrit nê papaja. Kot kaj mẽ ã amnhĩ nhĩpêx anhÿr o ri apa hãmri nhũm Tĩrtũm ja hã mẽ apumu nhũm ja kãm mex nê. ⁵ Annepê mã mẽ pakukamã mẽ panhõ wôwô nê mẽ panãjaja. Mẽ hkwy kot Tĩrtũm kôt amnhĩ nhĩpêx xwÿnhjaja na prem ã amnhĩ nhĩpêx anhÿr o pa. Mẽ kot mjên kôt amnhĩ nhĩpêx o pa jakamã na prem amnhĩ tã

mê omu nê mê ho mex nê kãm mê hapê nê. ⁶ Mê panhõ wôwô finat Saraja na pre ã amnhĩ nhĩpêx anhÿr o pa. Jao mjên Apraãw kapêr ma nê hkôt amnhĩ nhĩpêx. Nê kêp õ pahi hã harê nê hkôt pix mã amnhĩ nhĩpêx o ri pa. Tã kot kaj mê urak nê amnhĩ to htÿx nê ã amnhĩ nhĩpêx anhÿr o apa. Hãmri nê amnhĩ tã amã amjên puma hkêt nê apa nê te apê Sara hkra pyrak.

⁷ Nê mê amyjaja kêr ka mê tãm mê aprõ nhĩpêx o ri mê hkôt apa. Mê akĩnhã mê hihtÿx kêt jakamã mê kamã axukaprĩ rãhã ho ri mê hkôt apa. War ajamê war apê Jejus kukwak ri war atĩr tũm nê apa mã xwÿnh jakamã kêr ka mê ho mex rãhã ho ri mê hkôt apa. Tĩrtũm kãm war ajamê war ajapê jakamã kot kaj mê ã mê hipêx anhÿr o ri apa hãmri nê ra axãmnhĩx mẽmoj tã amnhĩ to Tĩrtũm wÿnhũm mê amar kurê kumrêx.

Tĩrtũm krajaja kot amnhĩ xà htÿx kamã hamak ã mẽ harênh

Rõmãn 12.9-21; Korosê 1.10; Wam Tesarõn 5.14-15

⁸ E Kris kôt ixkrãmnhwÿjaja. Nà ixkapêr jatur xà na ja. Kêr ka mê ri axpên kôt ajamaxpêr mex pê axpên to mex rãhã ho ri apa. Nê mẽ ate Kris kôt axpên to atõ nê atõx ã amã axpên kĩnh o ri apa. Jao axpên kamã axukaprĩ nê mẽmoj to axpên kutã anojarêt rãhã nê. ⁹ Na pu prem Jejus kôt amnhĩ xunhwÿnhũm Tĩrtũm mẽ pahto hkra nê mẽ pahto mex ã amnhĩ jarê. Tã koja mẽhõ tanhmã mẽ anhĩpêx to rÿ tanhmã mẽ ato kapêr punuj to. Nom kêr ka mẽ ama nê amnhĩ tã tanhmã ho rÿ tanhmã ho akapêr punuj to hkêt nê. ãm te Tĩrtũm kot mẽ panhĩpêx pyrak o mẽ hipêx nê mẽ ho mex pix o ri

mê hkôt apa. Ja na Tĩrtũm kãm hprãm. ¹⁰ Kapêr ã kagà htũm kot ja jarênh kot:

Kot kaj mê amã amex nê akĩnh nê ri apa hprãm hã kot kaj mê ã amnhĩ nhĩpêx anê:

Kot kaj mê ri akapêr punuj o ri apa hkêt nê.

Nê mẽmoj tã amnhĩ to axêx o ri apa hkêt nê.

¹¹ Nê te mê ate amnhĩ katut kôt ate amnhĩ tomnuj rênh o apa pyrã nê hpãnhã amnhĩ to mex pix o ri apa.

Nê mẽ amã tãm axpên nhĩpêx pix prãm o ri axpên kôt apa.

Nê mẽ amã ajamakêtkati nê axpên kôt apa hprãm rãhã ho ri apa.

¹² Na hte Tĩrtũmja ã mê kot amnhĩ nhĩpêx anhỹr o pa xwỹnhjê jamãr mex rãhã ho pa.

Nhũm mẽ tanhmã amnhĩ to hwỹr to nhũm mẽ mar kurê kumrêx.

No mẽ kot amnhĩ tomnuj o mẽ pa xwỹnhjaja na hte mẽ kutã amnhĩ xãm nê ãm mẽ omu nê mẽ ho mex kêt nê. Anê.

Tĩrtũm kapêr ã kagà htũm kot ã mẽ harênh kot anhỹr.

¹³ Nê kot kaj mê amã amnhĩ to mex pix o apa hprãm nhũm mẽhõ ja hã tanhmã mẽ atomnuj to hkêt nê. ¹⁴ No kot kaj mê amnhĩ to mex pix o apa htã nhũm mẽhõ ja hã apumu nê tanhmã hamaxpêr to nê atomnuj ka amnhĩ xà htỹx kamã ajamak japêr. Tã koja Tĩrtũm nhỹrmã ja hã tanhmã mẽ ato mex to. Jakamã kwa kêr ka mẽ tee ri mẽhõ kot tanhmã mẽ atomnuj to hkukamã ajamaxpêr pê amã mẽ uma ho ri apa hkêt nê. Nê tee ri amnhĩ kukamã ajamaxpêr o akaprĩ nê ri apa hkêt nê.

¹⁵ ãm amnhĩ kaxyw Kris mã mãn ajamaxpêr tỹx

râhã nẽ mẽ panhõ Pahihtĩ hã apijaàm râhã ho ri apa. Nhũm mẽhõ ja hã mẽ apumu nẽ tanhmã hã mẽ akukjêr to nẽ mẽ amã:

—Kwa mẽmo kaxyw na ka pre Kris kôt amnhĩ xãm nẽ hkôt ri amnhĩ nhĩpêx o apa? Anẽ.

Ka mẽ ama hãmri nẽ aprĩ hã kãm amnhĩ jarênh kurê kumrêx. ¹⁶ Nom kêr ka mẽ akapêr mã aprĩ kamã kãm amnhĩ jarê. Tĩrtũm kapêr kôt amnhĩ nhĩpêx o apa hã mẽ kãm amnhĩ jarê. Koja mẽ Kris ã mẽ ato kapêr punuj rỳ hã mẽ atã hpêr o axkê nẽ pikunhar japêr ka mẽ ãm amnhĩ tã mẽ ama nẽ ãm mẽ ama. Kwãr mẽ mãmrĩ ã mẽ anhĩpêx anẽ. Kêr ka mẽ amnhĩ tã mẽ omu nẽ arĩ amnhĩ to mex râhã ho ri apa. Kêr kê mẽ tee ri amnhĩ tã mẽ apumu nẽ hpijaàm nẽ.

¹⁷ Nẽ koja mẽ akwỳjaja mẽ ate Tĩrtũm kapêr kôt amnhĩ nhĩpêx mex o apa hã mẽ apumu nẽ hã tanhmã mẽ anhĩpêx to htã kêr ka mẽ arĩ Tĩrtũm kôt amnhĩ nhĩpêx o ri apa. Ja na kãm hprãm. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nẽ pahihtĩ mã mẽ ajarê nhũm kuma nẽ ja hã tanhmã mẽ amã àkjêr to ka mẽ ra apijaàm nẽ.

¹⁸ Nẽ Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tã mẽ pahte amnhĩ tomnuj piitã hpãnhã amnhĩrer pa. Mẽ pahte hkôt amnhĩ xunhwỳr nẽ nhỹrmã ma Tĩrtũm nhõ krĩ hwỳr paxàpir nẽ kamã pahtĩr tũm nẽ papa ho papa kaxyw. Mẽ kot hpĩr tã nhũm Tĩrtũm akupỳm ho htĩr nhũm htĩr o htĩr. ¹⁹⁻²⁰ Nom kormã akupỳm htĩr kêt ri na pre hkarõ pix o mẽ htyk xwỳnhjê hwỳr mỗ. Ahpunu kamã mẽ hkarõ kêp prês nẽ hkrĩ xwỳnhjê hwỳr mỗ nẽ mẽ kot Noehti

kapêr mar nê hkôt amnhĩ nhĩpêx kêt nhũm gô htàm kot mẽ hanhir par xwýnhjê mã kapêr. Tĩrtũm kot nhỹrmã mẽ kot amnhĩ tomnuj mýrapê kuwy maati wýr mẽ rênh ã mẽ hkukamã mẽ kãm awjarê. Amnepêm kormã Noehti kot pàr raxta nhĩpêx o kuhê ri na prem kãm Tĩrtũm kapêr mar prãm kêt nê. Nhũm amnhĩ tã mẽ omu nê mẽ kamã gryk tokyx anhýr kêt nê. Arĩ amnhĩ tã mẽ hamãr o pa. Mẽ kot hkôt amnhĩ xunhwýr nê hkôt amnhĩ nhĩpêx prãm xàj arĩ mẽ hamãr ry ho pa. No ãm tee ri mẽ hamãr kaprý nhũm mẽ amnhĩ kaxyw hkôt hamaxpêr kêt nê htýx ri amnhĩ tomnuj o pa. Mẽ ãm grêre nê Noehti kapêr ma nê gô htàm pymaj hkôt pàr raxta wýr agjê. ãm mẽ kêp 8 pix nê hwýr agjê nhũm gô htàm mẽ hanhir kêt nê. Tĩrtũm na pre mẽ nê omunh mex nê. No mẽ kot amnhĩ tomnuj xwýnhjaja nhũm gô htàmja mẽ hanhir o mẽ himex pa. Nhũm mẽ kêp 8ja pix arĩ htĩr nê mex nê pàr raxta kamã gô krãhkã hã mex rãhã pa.

²¹ Gô tàmja kêp hprĩ hã mẽ pahte Jejus kôt amnhĩ xunhwýr ã mẽ pahto amnhĩrĩt xà na. Mẽ pahte amnhĩ nhĩpêx tũm kaga nê hpãnhã amnhĩ nhĩpêx nyw o amnhĩ nhĩpêx o papa hã mẽ pahto amnhĩrĩt xà. Jakamã na htem mẽ pahkrã kumrã. Nom mẽ kot mẽ panê mẽ pagrã kugrãnh kaxyw kêt ra mẽ pahte Jejus kôt amnhĩ xunhwýr ã amnhĩ to amnhĩrĩt kaxyw na htem mẽ pahkrã kumrã. Ra mẽ pahte Tĩrtũm kapêr kôt amnhĩ nhĩpêx o papa hã amnhĩ to amnhĩrĩt kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to amnhĩrĩt. Te mẽ pahte gôx kãm mẽ pahte amnhĩ tomnuj rer par pyrã nê hpãnhã amnhĩ nhĩpêx nyw

o amnhĩ nhĩpêx o papa.

²² Nê na pre Jejus akupÿm htĩr nê ma akupÿm Tĩrtũm nhõ krĩ hwÿr api nê Tĩrtũm nhĩhkõ hã pahihiti hã mē hkrĩ xà kamã hkrĩ ho hkrĩ. Hãmri nê ra Tĩrtũm kapêr o mē wrÿk xwÿnh nê pahi piitã mē ho amnhĩptâr o hkrĩ.

4

Mē pahte amnhĩ nhĩpêx nyw o amnhĩ nhĩpêx ã mē pamã karõ

Epes 4.17-24; Korosẽ 3.1-11

¹ Nê na prem Kris pĩ nhũm amnhĩ xà htÿx kãm hamak kãm htyk kaxyw tã arĩ mē kãm xa. Ra kot amnhĩ xà hkukamã amnhĩ tã mē omunh tã tee ri amnhĩ kukamã hamaxpêr o amnhĩ tã tanhmã ri mē kot hpĩr mã xwÿnhjê homnuj to hkêt nê. Arĩ mē kãm xa nhũm prem kupĩ. Tã kêr pu mē uràk nê ã amnhĩ nhĩpêx anhÿr o ri papa. Mē kot hã tanhmã mē panhĩpêx to htã pu mē uràk nê amnhĩ xà htÿx kãm pajamak tã tanhmã amnhĩ tã mē ho hkêt nê. Na hte ra mē htyk nê mē hikwÿ xwÿnhjaja axte amnhĩ tomnuj kêt nê. Tã kêr pu mē uràk nê axte tanhmã amnhĩ tomnuj to ho ri papa hkêt nê.

² Jakamã kêr pu mē axte mē pahte amnhĩ nhĩpêx tũm kôt amnhĩ nhĩpêx o papa hkêt nê. Nê mē pajamaxpêr tũm kôt axte pajamaxpêr o papa hkêt nê. ãm Tĩrtũm kãm hprãm xà hkôt pix mã tanhmã amnhĩ nhĩpêx to ho papa rãhã ty.

³ Amnepêm kormã mē pahte Jejus kôt amnhĩ xunhwÿr kêt ri na pu prem mē kêp Tĩrtũm kra hkêt xwÿnhjê hkôt amnhĩ nhĩpêx.

Jao nhãm mēnijê pumu nê mē kamã pahpijaàm kêt hprãm.

Ně pahpipãnh o ri papa.

Ně mẽ pahpipãnh kaxyw axpën wỳr akuprõ nẽ mënijê kamã pahpijaàm kêt.

Ně sãnti hwỳr pahkõnkrã ho pahkrĩ nẽ kãm amnhĩ jagrer.

⁴ Tã Kris kôt amnhĩ xunhwỳ hãmri nẽ mẽ pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mẽ kot amnhĩ nhĩpêx tũm o amnhĩ nhĩpêx xwỳnhjaja tee ri ja hã mẽ pahpumu nẽ hêx rom amnhĩ kôt mẽ pamã tanhmã ri àhkrox to ho pa. Pu mẽ axte mẽ hkôt amnhĩ nhĩpêx kêt nhũm mẽ tee ri ja hã mẽ pahpumu nẽ mẽ pakamã gryk kato nẽ tanhmã mẽ pahto kapêr punuj to. ⁵ Tã koja Tĩrtũm nhỹrmã amnhĩ wỳr mẽ hã karõ nhũm mẽ ma hwỳr mra nẽ kutã hkrĩ. Nẽ kormã mẽ htĩr ri tanhmã mẽ kot amnhĩ nhĩpêx to ho pa hã kãm amnhĩ jarênh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Koja mẽ pahpiitã tanhmã mẽ pajarênh to. Mẽ htyk xwỳnhjaja nẽ kormã mẽ pahtĩr nẽ mẽ papa xwỳnhjaja nhũm mẽ pahpiitã tanhmã mẽ pajarênh to.

⁶ Na pre Jejus ty hãmri nẽ kormã akupỹm htĩr kêt rãhã hkarõ pix o ma amex wỳr tẽ nẽ kamã mẽ htĩr ri amnhĩ kaxyw Tĩrtũm mã hamaxpêr xwỳnhjê mã awjarê. Na prem mẽ kot amnhĩ tomnuj mỳrapê ra wej nẽ ty nẽ arĩ amex kãm ri pa. Jakamã nhũm Jejusja hkarõ ho ma mẽ hwỳr tẽ nẽ mẽ kãm:

—E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kôt ajamaxpêr jakamã kot kaj mẽ ma hwỳr api nẽ wa ixkuri wa ixpyrà nẽ atĩr tũm nẽ amex nẽ apa ho apa. Anẽ.

Mê pahpê Kris kwỳ hã tanhmã mẽ pahte axpẽn nhĩpêx to hã mẽ pamã karõ

Rõmãn 12.6-8; Wam Korõt 12.1-11

⁷ Nê koja tokyx mẽ panhõ pikaja mẽ pahpê hapêx nê kamã mẽmoj piitã hapêx pa. Jakamã kwa kêr ka mẽ ate amnhĩ nhĩpêx ã amnhĩ pumunh mex o apa.

Nê mẽ atỳx ri ajamaxpêr ri apa hkêt nê.

Nê mẽmoj punuj nê amnhĩ to htỳx o ri apa ho ajamaxpêr nyw pix o amnhĩ to Tĩrtũm wỳr rãhã ho ri apa.

⁸ Nê kwa kêr ka mẽ amã axpẽn kĩnh o ri axpẽn kôt apa. Ja na mex o mex. Kot kaj mẽ ã axpẽn nhĩpêx anê nhũm Kris kôt atõ rỳ atõxjê hõ tanhmã atomnuj to japêr ka amnhĩ tã omu nê ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpêr kêt nê.

⁹ Nê kêr ka mẽ axamnhĩx ajamakêtkati nê amnhĩ nhõrkwỹ hwỳr axpẽn wỳ nê axpẽn to mex o ri apa. Nom kêr ka mẽ agryk kãm amnhĩ wỳr mẽ hwỳr kêt nê. ¹⁰ Na pre ra Tĩrtũm mẽ pahpê hkra hã ahpỹnhã tanhmã mẽ pamã mẽmoj tã karõ hto nê ã mẽ pahte amnhĩ nhĩpêx anhỹr o papa kaxyw mẽ pahto mẽ paxihtỳx. Mẽ pahte ahpỹnhã tanhmã axpẽn to mex to ho ri axpẽn kôt papa kaxyw. Tã kêr ka mẽ ra kot mẽmoj tã mẽ amã karõ hkôt axpẽn nhĩpêx o ri axpẽn kôt apa. ¹¹ Koja ma mẽ ate akwỳjê mã kapêr jarênh o ri apa kaxyw mẽ amã karõ ka mẽ ama nê akatàt kôt ý hã mẽ kãm harênh mex o ri mẽ hkôt apa. Rỳ tanhmã axpẽn to ajuta hto ho ri apa kaxyw mẽ axunhwỳr japêr ka mẽ amnhĩ tã omu nê hkamnàr rom mẽ ho ajuta mex rãhã ho ri apa. Mẽ apiitã Jejus nhỹ hã ã amnhĩ nhĩpêx anhỹr o ri apa.

Kêr kê Jejus kôt mẽ akwỳjaja amnhĩ tã mẽ apumu nẽ mẽ anhỹ hã Tĩrtũm mã mex o mex ã harẽ.

Jejus kwỳjaja kot amnhĩ xà htỳx kamã hamak o pa hã mẽ harẽnh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprẽw 12.3; Xiakre 1.2-4

¹² E Kris kôt ixkràmnhwỳjaja. Koja Kris kwỳ kêt xwỳnhjaja Kris ã tanhmã mẽ anhĩpêx to nom kwa kêr ka mẽ tee ri amnhĩ kukamã ajamaxpêr o akaprĩ nẽ apa hkêt nẽ. Kêt mẽ akĩnh rãhã axpên kôt ri apa. Na htem ã mẽ pahpê Kris kwỳjê nhĩpêx anhỹr o pa. Jakamã kwa mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. ¹³ Mẽ arĩ akĩnh nẽ ri apa. Mẽ kot Kris pyrà nẽ mẽ panhĩpêx punuj tãã. Kêr kê Jejus nhỹrmã akupỹn mẽ pahwỳr wrỳ pu mẽ omu nẽ pahkĩnh tỳx o pahkĩnh tỳx. ¹⁴ Kwãr mẽ mãmri mẽ pahpê Kris kwỳ hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwỳnhjê nhĩpêx o pa anẽ.

¹⁵ Nẽ mẽ apê Kris kwỳ jakamã kwa kêr ka mẽ amnhĩ to mex rãhã o ri apa.

Jao mẽ hpar o ri apa hkêt nẽ.

Nẽ ri axàhkĩnh o ri apa hkêt nẽ.

Nẽ nhãm mẽ hkaêx mã agjêx o ri apa hkêt nẽ.

Nẽ tanhmã mẽ homnuj to ho ri apa hkêt nẽ.

Kot kaj mẽ ã amnhĩ nhĩpêx anhỹr o ri apa nhũm mẽ anhõ pahihtĩ ja hã tanhmã mẽ ato ka mẽ amnhĩ kamã apijaàm tỳx nẽ. ¹⁶ Nom koja mẽ apê Kris kwỳ hã tanhmã mẽ anhĩpêx to ka mẽ ja hã amnhĩ tã mẽ omu nẽ amnhĩ kamã apijaàm kêt nẽ. ãm Tĩrtũm pix mã amnhĩ jarẽ nẽ kãm:

—Pa Tirtûm. Ixpê akra Kris kwỳ hã na mẽ ã ixtomnuj anê. Nom ixpê akra jakamã kwâr mẽ mãmri tanhmã inhîpêx to. Amex o amex o ate ixto akra jakamã kwâr mẽ mãmri ã inhîpêx anhÿr o pa. Anê.

¹⁷ Nê koja Tirtûm tokyx mẽ pahpiitã tanhmã mẽ pahte amnhî nhîpêx to hã mẽ pahpumu nê tanhmã mẽ panhîpêx to. Mẽ pahpê hkrajaja koja tanhmã mẽ pahte amnhî nhîpêx to hã tanhmã mẽ pahto mex to. Hãmri nê hpãnhã mẽ kêp hkra hkêt xwÿnhjê ho hapu nê tanhmã mẽ hipêx to. Mẽ kot amnhî kaxyw hkôt hamaxpêr kêt jakamã nhũm mẽ pahkĩnhã tanhmã mẽ homnuj tÿx to. ¹⁸ Kapêr ã kagà htũm kot ja hã mẽ pajarênh kot:

Mẽ kot Tirtûm kapêr kôt amnhî to mex xwÿnhjaja na htem àmnhîx amnhî xà htÿx kamã hamak o pa kamã ty nhũm Tirtûm ma õ krî hwÿr amnhî wÿr mẽ ho àpir kurê kumrêx.

Nom mẽ kot amnhî tomnuj xwÿnhjaja koja mẽ hkĩnhã amnhî xà htÿx kamã hamak rãhã nê pa ho pa nê aa mex kêt nê. Anê.

¹⁹ Tã koja Tirtûm kãm ja prãm japêr kwâr mẽ mãmri Kris ã tanhmã mẽ pahtomnuj to. Nom kêr pu mẽ Tirtûm kamnàr rom amnhî to mex pix o ri papa. Kêp mẽ panhîpêx xwÿnh maati jakamã ra kot amnhî jarênh xà hkôt koja tanhmã ri mẽ pamã amnhî nhîpêx to ho pa.

5

*Tirtûm krajaja kot tanhmã amnhî nhîpêx to hã mẽ kãm karõ
Atre 20.28-31*

¹ E kot paj hpãnhã mẽ apê Kris kwỳ hkrãhtũmjê mã ixkapêr ka mẽ inhma. Ijaxwỳja ixpê mẽ akrãhtũmjê hõ na pa. Na pa pre mẽ akurom Kris htyk kãm omu. Nom kot puj mẽ nhỹrmã pahpimràatã mex o mex ã omu nẽ uràk nẽ mẽ pamex nẽ ri papa ho papa. ²⁻³ Jakamã e Kris kôt mẽ hkrãhtũmjaja kêr ka mẽ atar Kris kôt pahkwỳjê jamãr mex nẽ. Ra Tĩrtũm kot mẽ ate kãm hkwỳjê jamãr kaxyw mẽ axunhwỳr jakamã kêr ka mẽ omunh mex rãhã ho mẽ hkôt ri apa. Te ho ôwêhti jamãr xwỳnh kot ôwêhti jamãr mexta pyràk. Te mẽ kêp Tĩrtũm krit ôwêhti nhũm mẽ ate kãm mẽ hamãr o apa xwỳnh pyrà nẽ kãm mẽ omunh mex rãhã ho ri mẽ hkôt apa. Nẽ akĩnh pê tanhmã ri mẽ ho ajuta hto ho ri mẽ hkôt apa. Ja na Tĩrtũm kãm hprãm. Nom kêr ka mẽ ano hkà karôt kãm mẽ ho ajuta hkêt nẽ. Rỳ kàxpore hprãm xàj mẽ kãm tanhmã amnhĩ nhĩpêx to hkêt nẽ. ãm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa.

Nẽ kêr ka mẽ kãm mẽmoj tã karõ kamã axihtỳx kêt nẽ. Mẽ akapêr mã aprĩ kamã mẽ kãm mẽmoj jarẽ kê mẽ amnhĩ tã mẽ apumu nẽ mẽ apyrà nẽ ã axpẽn nhĩpêx anhỹr o pa.

⁴ E kêr ka mẽ ã Kris kôt mẽ akwỳjê jamãr mex pê mẽ hipêx o apa anẽ. Hãmri nhũm mẽ pajamãr xwỳnh maatija ja hã mẽ apumu nẽ nhỹrmã akupỳn mẽ pahwỳr wrỳ nẽ mẽ ato mex rax nẽ.

⁵ Nẽ e mẽ amy xàptàr nywjaja. Kêr ka mẽ Kris kôt mẽ akrãhtũmjê kapêr ma nẽ mẽ hkôt ri amnhĩ nhĩpêx mex o ri apa.

Nẽ kwa kêr ka mẽ apiitã axpẽn nhĩpêx o te anhĩõ

kot amnhĩ to rax o ajakrenh pyræk. Tĩrtũm kapẽr ã kagà htũm kot ja jarẽnh kot:

Mẽ kot amnhĩ to jarkrar o ri mẽ pa xwỳnhjaja na hte Tĩrtũm mẽ kutã amnhĩ xunhwỳ.

No mẽ kot amnhĩ to hkryre nẽ axpẽn tã hpijaàm o mẽ pa xwỳnhjaja na hte mẽ ho mex o pa.

⁶ Anhỹr ã mẽ harẽnh jakamã kwa kêr ka mẽ Tĩrtũm ã apijaàm rãhã ho ri apa ixkwỳjaja. Nẽ axpẽn mã ri amnhĩ to jarkrar o ri apa hkêt nẽ. Kêr kê Tĩrtũm xihtỳx xwỳnhja ja hã mẽ apumu hãmri nẽ nhỹrmã kot mẽ pahto mex xà hã arĩgroja kato nhũm mẽ ate amnhĩ to mex xwỳnh ã mẽ ajarẽ nẽ mẽ ato mex rax nẽ.

⁷ Nẽ kêr ka mẽ tee ri amnhĩ kukamã ajamaxpẽr pê akaprĩ ho ri apa hkêt nẽ. ãm te mẽ ate Tĩrtũm mã akaprĩ nhõr pyræk o amnhĩ nhĩpêx nẽ axàmnhĩx akĩnh nẽ akaprĩ hkêt nẽ apa. Tĩrtũm kêp mẽ pajamãr xwỳnh maati kênã kot ka kêr mẽ ri akaprĩ nẽ ri apa.

⁸ Nẽ kwa mẽ okora. Kêr ka mẽ amnhĩ nê kot mẽ pakutã amnhĩ xunhwỳr xwỳnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrar pyræk o mẽ panhĩpêx. Jao mẽ pahte Kris kaga hprãm xaj apkati mẽ tanhmã nê mẽ pahto ho ri mẽ pahkõt pa. ⁹ Na hte ã pika piitã hkõt Kris kõt mẽ pahtõ nẽ mẽ pahtõxjê nhĩpêx anhỹr o pa nhũm mẽ pahpyrà nẽ amnhĩ xà htỳx kamã hamak o pa pê omnuj nẽ pa. Jakamã kwa kêr ka mẽ Kris kõt amnhĩ xunhwỳr tỳx nẽ kutã amnhĩ to htỳx rãhã ho ri apa. ¹⁰ Tĩrtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nẽ nhỹrmã mẽ pahte kuri tãm

amnhĩ nhĩpêx o papa mã xwỳnh ã mẽ pajarẽ. Kris kukwak ri ã mẽ pajarẽnh anhỹr jakamã mẽ ate jar Kris ã apunuj nẽ ri apa htã kot kaj mẽ kritpêm ã amnhĩ nhĩpêx anhỹr ry hkêt nẽ. Koja Tĩrtũm mẽ akrã kamã mẽ ajamaxpêr xihtỳx jagjê ka mẽ akupỳm amex nẽ axihtỳx pê ate amnhĩ nhĩpêx nyw o amnhĩ nhĩpêx rãhã ho ri apa.

11 Tĩrtũmja hihtỳx o hihtỳx nẽ àhpumunh o àhpumunh. Nẽ hihtỳx xà nẽ àhpumunh xà koja aa kêp hirerek nẽ hapêx kêt kumrêx. ãm hãmri na mẽ kot harênh kot anhỹrja.

Pêtre kapêr jatur xà

12 Nẽ ota Kris kôt mẽ pahtõ Sirastija na inhmã mẽ akaxyw kagàja nhĩpêx pa mẽ awỳr mẽnũ kaxyw. Na pa hte kãm ixkapêr nhũm inhma nẽ inhmã hã kagà. Na hte Kris kapêr kôt amnhĩ nhĩpêx rãhã ho ri pa. Tã inhmã kagàja nhĩpêx. Mẽ ate kamã harênh nẽ mar nẽ tãm ajamaxpêr kaxyw. Nẽ Tĩrtũm kãm mẽ ajapê nẽ kot mẽmoj to mẽ akutã nojarêt ã mẽ ate kamã harênh kaxyw. Tã kêt ka mẽ kãm mẽ ajapê hã amnhĩ tã harênh ma nẽ kapêr kôt pix mã amnhĩ nhĩpêx mex rãhã ho ri apa. Mẽ akwỳjaja kot tanhmã hã mẽ ato htãã.

13 Nẽ ota jar Papirõn kamã Kris kôt mẽ pahtõ nẽ mẽ pahtõxjaja mẽ awỳr hpêr mẽ. Tĩrtũm kot mẽ pahpyrà nẽ mẽ ho hkra jakamã mẽ kêp mẽ atõ nẽ mẽ atõx ã mẽ awỳr hpêr mẽ. Nẽ Xiakre mããnẽn mẽ awỳr hpêr mẽ. Te kêp ixkra pyræk.

14 Nẽ kêt ka mẽ nhỹri apê Kris kwỳ hã axpẽn pumu nẽ mẽ axpẽn to atõ nẽ atõx ã axpẽn mã akapêr mex kurê kumrêx.

E kê Tĩrtũm mẽ apê Kris kwỳ hã mẽ amã mẽ
ajamakêtkati nẽ mẽ apa xà gõ ka mẽ axàmnhĩx
ajamakêtkati nẽ amex nẽ ri apa ho apa.

Tã ãm ja pix. Ixpê Simãw Pêtre na pa ã mẽ awỳr
kagà nẽ mẽnh anẽ.

Tĩrtũm kapër ã kagà nyw **New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022

383a4e22-34cd-505f-9cc2-2f9921e7aa9f